

# საქართველოს პრეზიდენტის

ბრძანებულება №237

2014 წლის 10 ივნისი

ქ.თბილისი

## საქართველოს მოქალაქეობის საკითხთა განხილვისა და გადაწყვეტის შესახებ დებულების დამტკიცების თაობაზე

### მუხლი 1

„საქართველოს მოქალაქეობის შესახებ“ საქართველოს ორგანული კანონის 28-ე მუხლის შესაბამისად, დამტკიცდეს თანდართული საქართველოს მოქალაქეობის საკითხთა განხილვისა და გადაწყვეტის შესახებ დებულება.

### მუხლი 2

„ნორმატიული აქტების შესახებ“ საქართველოს კანონის 25-ე მუხლის შესაბამისად, ძალადაკარგულად გამოცხადდეს:

1. [„საქართველოს მოქალაქეობის საკითხებზე განცხადების და წარდგინების განხილვის წესის თაობაზე დებულების დამტკიცების შესახებ“ საქართველოს პრეზიდენტის 2009 წლის 30 იანვრის №34 ბრძანებულება.](#)
2. [„უცხო ქვეყნის მოქალაქისათვის საქართველოს მოქალაქეობის მინიჭების წესის შესახებ“ საქართველოს პრეზიდენტის 2006 წლის 26 იანვრის №80 ბრძანებულება.](#)
3. [„საქართველოს საპატიო მოქალაქეობის შესახებ“ დებულების დამტკიცების თაობაზე“ საქართველოს პრეზიდენტის 2008 წლის 15 ივლისის №370 ბრძანებულება.](#)
4. [„გარდამავალ პერიოდში საქართველოს მოქალაქეობის საკითხთა განხილვა-გადაწყვეტის მოწესრიგებისათვის აუცილებელი ღონისძიებების გატარების შესახებ“ საქართველოს პრეზიდენტის 2009 წლის 23 თებერვლის №66 ბრძანებულება.](#)
5. [„საქართველოს მოქალაქეობის დადგენის საკითხთა დაჩქარებული და გამარტივებული წესით განხილვა-გადაწყვეტის დროებითი რეჟიმის შემოღების შესახებ“ საქართველოს პრეზიდენტის 2001 წლის 17 აპრილის №136 ბრძანებულება.](#)

### მუხლი 3

ეს ბრძანებულება ამოქმედდეს 2014 წლის 11 ივნისიდან.

საქართველოს პრეზიდენტი

გიორგი მარგველაშვილი

## საქართველოს მოქალაქეობის საკითხთა განხილვისა და გადაწყვეტის შესახებ დებულება თავი I

### ზოგადი დებულებები

#### მუხლი 1

„საქართველოს მოქალაქეობის საკითხთა განხილვისა და გადაწყვეტის შესახებ დებულება (შემდგომი - დებულება) უკავშირდება საქართველოს მოქალაქეობის მინიჭებასა და შეწყვეტას და განსაზღვრავს „საქართველოს მოქალაქეობის შესახებ“ საქართველოს ორგანული კანონის (შემდგომი - კანონი) შესაბამისად საქართველოს მოქალაქეობის მოპოვებისა (საქართველოს მოქალაქეობის ჩვეულებრივი წესით მინიჭება, გამარტივებული წესით მინიჭება, საგამონაკლისო წესით მინიჭება, აღდგენის წესით მინიჭება, საქართველოს მოქალაქეობის დადგენა) და საქართველოს მოქალაქეობის შეწყვეტის (საქართველოს მოქალაქეობიდან გასვლა, საქართველოს მოქალაქეობის დაკარგვა), აგრეთვე საპატიო მოქალაქეობის მინიჭების საკითხთა განხილვა-გადაწყვეტის, მოქალაქეობის საკითხებზე მიღებულ გადაწყვეტილებათა აღსრულების, მათი კონტროლისა და მოქალაქეობის საკითხთა სტატისტიკის წარმოების წესებს.

#### მუხლი 2

1. ამ დებულებაში გამოყენებულ ტერმინებს აქვს კანონით განსაზღვრული მნიშვნელობა.
2. ამ დებულების მიზნებისათვის ქვემოთ ჩამოთვლილ ტერმინებს აქვს შემდეგი მნიშვნელობა:

ა) უფლებამოსილი ორგანო - საქართველოს იუსტიციის სამინისტროს მმართველობის სფეროში მოქმედი



საჯარო სამართლის იურიდიული პირი – სახელმწიფო სერვისების განვითარების სააგენტო (შემდეგში - სააგენტო), სააგენტოს ტერიტორიული სამსახური (შემდეგში - ტერიტორიული სამსახური), საზღვარგარეთ საქართველოს დიპლომატიური წარმომადგენლობა ან საკონსულო დაწესებულება, ან მესამე სახელმწიფოს დიპლომატიურ წარმომადგენლობაში შექმნილი საქართველოს ინტერესთა სექცია (შემდეგში - საქართველოს დიპლომატიური წარმომადგენლობა ან საკონსულო დაწესებულება);

ბ) ერთიანი რეესტრი - სააგენტოს საქართველოს მოქალაქეთა და საქართველოში მცხოვრებ უცხოელთა მონაცემების ერთიანი რეესტრი;

გ) დაინტერესებული პირი - პირი, რომლის ინტერესების დასაცავად ხორციელდება ადმინისტრაციული წარმოება სააგენტოსა და მის ტერიტორიულ სამსახურში;

დ) განმცხადებელი - დაინტერესებული პირი, მისი კანონიერი წარმომადგენელი ან პირი, რომელიც მოქმედებს მინდობი-ლობის/რწმუნებულების საფუძველზე.

### **მუხლი 3**

1. საქართველოს მოქალაქეობა არის საქართველოსთან პირის სამართლებრივი კავშირი.  
2. საქართველოში დადგენილია ერთიანი მოქალაქეობა. საქართველოს მოქალაქე იმავდროულად არ შეიძლება იყოს სხვა ქვეყნის მოქალაქე, გარდა კანონის მე-17 მუხლით გათვალისწინებული შემთხვევისა.

### **მუხლი 4**

1. საქართველოს მოქალაქეობა მოიპოვება დაბადებითა და ნატურალიზაციით. ნატურალიზაცია ხორციელდება საქართველოს პრეზიდენტის მიერ საქართველოს მოქალაქეობის მინიჭებით.  
2. ნატურალიზაციის სახეებია:

ა) საქართველოს მოქალაქეობის ჩვეულებრივი წესით მინიჭება - მოქალაქეობის არმქონე პირისათვის ან სხვა ქვეყნის მოქალაქისათვის საქართველოს მოქალაქეობის მინიჭება;

ბ) საქართველოს მოქალაქეობის გამარტივებული წესით მინიჭება - საქართველოს მოქალაქეზე დაქორწინებული პირისათვის ან რეპატრიანტის სტატუსის მქონე პირისათვის საქართველოს მოქალაქეობის მინიჭება;

გ) საქართველოს მოქალაქეობის საგამონაკლისო წესით მინიჭება - საქართველოს პრეზიდენტის მიერ უცხო ქვეყნის მოქალაქისათვის საქართველოს მოქალაქეობის მინიჭება საქართველოს კონსტიტუციის მე-12 მუხლის მე-2 პუნქტის შესაბამისად;

დ) საქართველოს მოქალაქეობის აღდგენის წესით მინიჭება - საქართველოს მოქალაქეობაზე წყვეტილი პირისათვის საქართველოს მოქალაქეობის მინიჭების გზით აღდგენა.

### **მუხლი 5**

1. სხვა ქვეყნის მოქალაქეობის მიღების შემთხვევაში, საქართველოს მოქალაქეს, გარდა საქართველოს იმ მოქალაქისა, რომელსაც საქართველოს მოქალაქეობა საგამონაკლისო წესით მიენიჭა, შეუწყდება საქართველოს მოქალაქეობა.  
2. საქართველოს მოქალაქეობის შეწყვეტის სახეებია:

ა) საქართველოს მოქალაქეობიდან გასვლა - პირის მიერ საქართველოს მოქალაქეობაზე უარის თქმა;

ბ) საქართველოს მოქალაქეობის დაკარგვა:

ბ.ა) საქართველოს მოქალაქის მიერ საქართველოს კომპეტენტური ორგანოების ნებართვის გარეშე სხვა ქვეყნის სამხედრო, პოლიციის ან უშიშროების სამსახურში შესვლის საფუძველზე;

ბ.ბ) საქართველოს მოქალაქეობის მოსაპოვებლად ყალბი დოკუმენტების წარდგენის საფუძველზე;

ბ.გ) საქართველოს მოქალაქის მიერ სხვა ქვეყნის მოქალაქეობის მოპოვების საფუძველზე, გარდა იმ შემთხვევისა, როდესაც საქართველოს მოქალაქეს საქართველოს მოქალაქეობა მინიჭებული აქვს საგამონაკლისო წესით.

## **თავი II**

### **საქართველოს მოქალაქეობის საკითხზე განცხადების წარდგენის წესი**

### **მუხლი 6**

1. დაინტერესებული პირი საქართველოს მოქალაქეობის საკითხზე განცხადებით უფლებამოსილ ორგანოს



მიმართავს პირადად ან წარმომადგენლის მეშვეობით.

2. საქართველოს მოქალაქეობის მინიჭების, საქართველოს მოქალაქეობის დადგენის, საქართველოს მოქალაქეობიდან გასვლისა და საქართველოს მოქალაქეობის დაკარგვის შესახებ ამ დებულებით დადგენილი ფორმის განცხადებები და საკითხის განხილვისათვის საჭირო დოკუმენტები განმცხადებელს შეაქვს სააგენტოში ან ტერიტორიულ სამსახურში, ხოლო საქართველოს ფარგლებს გარეთ მცხოვრებ პირს - საქართველოს დიპლომატიურ წარმომადგენლობაში ან საკონსულო დაწესებულებაში. საქართველოს კონსტიტუციის მე-12 მუხლის მე-2 პუნქტით გათვალისწინებულ შემთხვევაში, განმცხადებელს შეუძლია უშუალოდ მიმართოს საქართველოს პრეზიდენტს და გაუგზავნოს მას განცხადებები და საკითხის განხილვისთვის საჭირო დოკუმენტები.

3. საქართველოს დიპლომატიური წარმომადგენლობა ან საკონსულო დაწესებულება მოქალაქეობის საკითხზე წარდგენილ განცხადებასა და საკითხის განხილვისათვის საჭირო დოკუმენტებს წარდგენიდან 3 დღეში წერილობითი ან ელექტრონული ფორმით უგზავნის სააგენტოს უშუალოდ ან საქართველოს საგარეო საქმეთა სამინისტროს მეშვეობით.

4. საქართველოს მოქალაქეობის შესახებ განცხადებისა და საკითხის განხილვისათვის საჭირო დოკუმენტების სააგენტოში ელექტრონული ფორმით გაგზავნის შემთხვევაში, საქართველოს დიპლომატიური წარმომადგენლობა ან საკონსულო დაწესებულება ვალდებულია ყოველი კვარტალის ბოლოს უზრუნველყოს განცხადებისა და დოკუმენტების ასევე წერილობითი ფორმით გადაგზავნა.

5. საქართველოს დიპლომატიური წარმომადგენლობა ან საკონსულო დაწესებულება პასუხისმგებელია ელექტრონული და წერილობითი ფორმით გაგზავნილი დოკუმენტების იდენტურობისათვის.

#### **მუხლი 7**

1. მოქალაქეობის საკითხზე განცხადების განხილვისა და გადაწყვეტილების მიღების პროცესში სააგენტოსა და სხვა ადმინისტრაციულ ორგანოებს შორის კომუნიკაცია შეიძლება განხორციელდეს როგორც მატერიალური, ისე ელექტრონული ფორმით, დადგენილი წესით.

2. დაინტერესებულ პირთან კომუნიკაცია ხორციელდება მისთვის შესაბამისი შეტყობინების გაგზავნის ან დოკუმენტის სააგენტოს ვებგვერდზე გამოქვეყნების გზით. სააგენტოში განცხადების წარდგენისას განმცხადებელი უფლებამოსილია ასევე მიუთითოს სააგენტოსთან კომუნიკაციის დამატებითი საშუალება – ელექტრონული ფოსტა.

#### **მუხლი 8**

1. განმცხადებელი მოქალაქეობის საკითხებზე განცხადებას წარადგენს პირადად ან ამ დებულების მე-16 მუხლით განსაზღვრული წესით.

2. ფიზიკური ნაკლის, ავადმყოფობის ან სხვა საპატიო მიზეზის არსებობის შემთხვევაში, დაინტერესებული პირის სახელით, მისივე დავალებით, განცხადებასა და შესაბამის დოკუმენტებს ხელს აწერს სხვა პირი, რაც დასტურდება სანოტარო წესით ან განცხადების მიმღები ორგანოს უფლებამოსილი თანამდებობის პირის მიერ.

3. სხვა სახელმწიფოში მცხოვრებ პირთა ხელმოწერა განცხადებაზე შეიძლება დადასტურდეს საქართველოს დიპლომატიური წარმომადგენლობის ან საკონსულო დაწესებულების უფლებამოსილი პირის მიერ.

4. ამ დებულებით გათვალისწინებული მომსახურების გაწევისათვის უფლებამოსილი პირის თანხმობის გამოხატვა და განცხადების წარდგენაზე უფლებამოსილი პირის მიერ წარმომადგენლობითი უფლებამოსილების მესამე პირისათვის მინიჭება შეიძლება განხორციელდეს ამ დებულების მე-16 მუხლის მე-2 პუნქტით გათვალისწინებულ შემთხვევაში.

#### **მუხლი 9**

1. საქართველოს მოქალაქეობის საკითხებზე განმცხადებელი წარადგენს:

ა) დადგენილი ფორმის მიხედვით შევსებულ განცხადებას;

ბ) ფოტოსურათს - ზომით 3X4;

გ) მომსახურების საფასურის გადახდის დამადასტურებელ დოკუმენტს;

დ) ამ დებულებით გათვალისწინებული შესაბამისი საკითხის განხილვისათვის საჭირო სხვა დოკუმენტებს.

2. მოქალაქეობის საკითხის განხილვისათვის დაწესებული საფასურის გადახდა დასტურდება საქართველოს საბანკო დაწესებულების მიერ გაცემული ქვითრით, ხოლო საზღვარგარეთ საფასურის გადახდის შემთხვევაში - შესაბამისი ქვეყნის ტერიტორიაზე განთავსებული საბანკო დაწესებულების მიერ გაცემული ქვითრით.

3. ქვითრის წარდგენა საჭირო არ არის, თუ მომსახურების საფასურის გადახდა განხორციელდა უნაღდო



ანგარიშსწორების ფორმით და სააგენტოს აქვს შესაძლებლობა, კომუნიკაციის ელექტრონული საშუალებების გამოყენებით შეამოწმოს ანგარიშსწორების განხორციელების ფაქტი.

4. მოქალაქეობის საკითხებზე განცხადება მიღებულად ითვლება სააგენტოს მოქალაქეობისა და მიგრაციის ელექტრონული მართვის სისტემაში რეგისტრაციის დღიდან.

5. სააგენტოს მონაცემთა ელექტრონული ბაზებით უზრუნველყოფილ უფლებამოსილ ორგანოში განცხადების წარდგენის დროს განმცხადებელს გადაეცემა სამახსოვრო ბარათი, სადაც, სხვა შესაბამის ინფორმაციასთან ერთად, მითითებული უნდა იყოს დაინტერესებულ პირთან კომუნიკაციის ფორმა. სამახსოვრო ბარათის ფორმა მტკიცდება სააგენტოს თავმჯდომარის ინდივიდუალური ადმინისტრაციულ-სამართლებრივი აქტით.

#### **მუხლი 10**

1. საქართველოს მოქალაქეობის საკითხზე განცხადება და თანდართული დოკუმენტები წარდგენილი უნდა იქნეს სახელმწიფო ენაზე. სხვა ენაზე შედგენილი დოკუმენტები მიიღება სათანადო წესით დამოწმებული ფორმით, სანოტარო წესით დამოწმებულ ან საკონსულოს თანამდებობის პირის მიერ შესრულებულ და დადასტურებულ ქართულენოვან თარგმანთან ერთად. სააგენტო უფლებამოსილია საქართველოს მოქალაქეობის საგამონაკლისო წესით და რეპატრიანტის სტატუსის მქონე პირისთვის გამარტივებული წესით მოქალაქეობის მინიჭების შესახებ განცხადება მიიღოს არასახელმწიფო ენაზეც.

2. უცხო სახელმწიფოში გაცემული დოკუმენტები წარდგენილი უნდა იქნეს მატერიალური ფორმით, სათანადო წესით ლეგალიზაციის ან აპოსტილით დამოწმების შემდეგ, თუ საქართველოს საერთაშორისო ხელშეკრულებით ან შეთანხმებით სხვა რამ არ არის დადგენილი.

3. სააგენტო უფლებამოსილია მიიღოს სხვა ქვეყნის მოქალაქის პასპორტი ამ მუხლის პირველი პუნქტით განსაზღვრული მოთხოვნების დაუცველად, თუ იგი შეიცავს განმცხადებლის პერსონალური მონაცემების ლათინურ ტრანსლიტერაციას.

4. წარდგინების საფუძველზე ან საქართველოს მოქალაქეობის საკუთარი ინიციატივით დაკარგვის საკითხის განხილვის შემთხვევაში, შესაძლებელია სხვა სახელმწიფოს მიერ გაცემული დოკუმენტები სააგენტოს მიერ განსახილველად მიღებულ იქნეს ქართულენოვანი თარგმანის, ასევე ლეგალიზებისა და აპოსტილით დამოწმების გარეშე.

#### **მუხლი 11**

1. არასრულწლოვნის ან ქმედუუნარო პირის მოქალაქეობის საკითხი განიხილება მათი კანონიერი წარმომადგენლის განცხადების საფუძველზე.

2. 14-დან 18 წლამდე არასრულწლოვანი პირის მოქალაქეობის საკითხზე კანონიერი წარმომადგენლის მიერ წარდგენილ განცხადებას უნდა დაერთოს არასრულწლოვნისა და მეორე მშობლის (არსებობის შემთხვევაში) წერილობითი თანხმობა. არასრულწლოვანს წერილობითი თანხმობის წარდგენა არ მოეთხოვება, თუ იგი, ამასთანავე, ქმედუუნარო პირია.

3. არასრულწლოვნის ან ქმედუუნარო პირის კანონიერი წარმომადგენლის თანხმობა გამოხატული უნდა იქნეს:

ა) სათანადო წესით დამოწმებული წერილობითი ფორმით;

ბ) სააგენტოს უფლებამოსილი პირის ან საკონსულო თანამდებობის პირის თანდასწრებით, წერილობითი ფორმით;

გ) პირადობის ელექტრონული მოწმობის გამოყენებით სააგენტოს ვებგვერდზე განთავსებული თანხმობის ფორმის წარდგენის გზით;

დ) სააგენტოს უფლებამოსილი პირის წინაშე თანხმობის ელექტრონული კომუნიკაციის საშუალებით გამოხატვის გზით, თუ თანხმობის გამცემი პირის იდენტიფიცირება და პირადობის დადასტურება შესაძლებელია სააგენტოს მონაცემთა ელექტრონულ ბაზაში არსებული ინფორმაციის გამოყენებით.

4. ამ მუხლის მე-3 პუნქტის „ბ“ ქვეპუნქტით განსაზღვრული პირების თანდასწრებით გამოხატული თანხმობა უნდა დადასტურდეს ამ პირების ხელმოწერით.

#### **მუხლი 12**

1. თუ მოქალაქეობის საკითხთა განხილვისას სააგენტოს მონაცემთა ელექტრონულ ბაზაში არ მოიპოვება პირადობის დამადასტურებელი დოკუმენტის გაცემის ან რეგისტრაციის განხორციელების პროცესში შექმნილი ფოტოსურათიანი ჩანაწერი ან, ფოტოსურათის არსებობის მიუხედავად, ვერ დგინდება განაცხადზე დართულ ფოტოსურათთან პირის იდენტურობა ხანდაზმულობის ან სხვა მიზეზის გამო, ფოტოსურათზე გამოსახული პირის განაცხადში მითითებული პირის მონაცემებთან იდენტურობა განცხადების მიმღები



ორგანოს უფლებამოსილი პირის თანდასწრებით შეიძლება წერილობით დაადასტუროს საქართველოს სრულწლოვანმა მოქალაქემ (ფოტოიდენტურობის დადასტურება).

2. თუ არასრულწლოვან პირს არ აქვს ფოტოსურათიანი დოკუმენტი, განცხადებაზე დართულ ფოტოსურათზე გამოსახული პირის ამავე განცხადებაში მითითებული არასრულწლოვანი პირის მონაცემებთან იდენტურობა წერილობით შეიძლება დადასტურდეს განმცხადებლის მიერ.

### **მუხლი 13**

1. განმცხადებელი ვალდებულია განცხადებასთან ერთად წარადგინოს მოქალაქეობის საკითხის განსახილველად საჭირო ყველა საბუთი. დოკუმენტაციის არასრულად წარდგენის შემთხვევაში, სააგენტო, მის მიერ განცხადების რეგისტრაციიდან 3 დღეში, განმცხადებელს განუსაზღვრავს გონივრულ ვადას ხარვეზის აღმოსაფხვრელად.

2. თუ სააგენტოს მიერ დადგენილ ვადაში განმცხადებელი არ წარადგენს შესაბამის დოკუმენტს ან ინფორმაციას, სააგენტო უფლებამოსილია მიიღოს გადაწყვეტილება განცხადების განუხილველად დატოვების შესახებ.

3. განმცხადებელმა ამ დებულებით განსაზღვრული დოკუმენტაცია უნდა წარადგინოს იმ შემთხვევაში, თუ შესაბამისი მონაცემები არ მოიპოვება სააგენტოს ერთიან რეესტრში.

4. სააგენტო უფლებამოსილია განმცხადებელს საკითხის განხილვისა და გადაწყვეტისათვის მნიშვნელოვანი გარემოების დადგენისათვის საჭირო დოკუმენტი ან/და ინფორმაცია მოსთხოვოს ადმინისტრაციული წარმოების ნებისმიერ სტადიაზე.

5. დოკუმენტის ან/და ინფორმაციის წარმოსადგენად სააგენტოს მიერ განმცხადებლისათვის განსაზღვრული ვადის გასვლამდე განცხადების განხილვის ვადის დინება შეჩერებულად ითვლება.

### **მუხლი 14**

თუ განმცხადებელი აღარ არის დაინტერესებული საქართველოს მოქალაქეობის საკითხით, იგი უფლებამოსილია ადმინისტრაციული წარმოების ნებისმიერ სტადიაზე მიმართოს სააგენტოს და მოითხოვოს წარმოების შეწყვეტა.

### **მუხლი 15**

1. საქართველოს მოქალაქეობის საკითხზე საბოლოო გადაწყვეტილების მიღების ვადა არ უნდა აღემატებოდეს განცხადების/წარდგინების რეგისტრაციის დღიდან 3 თვეს.

2. საქართველოს სამართლებრივი კავშირის დადგენის საკითხზე საბოლოო გადაწყვეტილების მიღების ვადა არ უნდა აღემატებოდეს 15 კალენდარულ დღეს შესაბამის ორგანოში განცხადების რეგისტრაციის დღიდან, ხოლო საქართველოსთან პირის სამართლებრივი კავშირის დადგენის თაობაზე საქართველოს დიპლომატიურ წარმომადგენლობაში ან საკონსულო დაწესებულებაში წარდგენილი განცხადების შემთხვევაში - 5 კალენდარულ დღეს.

3. ამ მუხლის პირველ პუნქტში აღნიშნული ვადის დინება შეიძლება შეჩერდეს დოკუმენტაციის წარდგენიდან სხვა ქვეყნის მოქალაქის საქართველოში ჩამოსვლამდე, თუ სხვა ქვეყნის მოქალაქისათვის საქართველოს მოქალაქეობის მინიჭების მიზანშეწონილობის საკითხის განხილვისას სააგენტო აუცილებლად მიიჩნევს მასთან პირადად გასაუბრებას.

4. თუ საქართველოსთან სამართლებრივი კავშირის დადგენის თაობაზე გადაწყვეტილების მისაღებად აუცილებელია სახელმწიფო დაწესებულებებიდან და იურიდიული პირებიდან ინფორმაციის მოძიება ან დადასტურება, საქართველოსთან სამართლებრივი კავშირის დადგენის საკითხზე საბოლოო გადაწყვეტილების მიღებისათვის ამ მუხლის მე-2 პუნქტით დადგენილი ვადა შეიძლება გაგრძელდეს არა უმეტეს 1 თვით.

### **მუხლი 16**

1. ელექტრონული ფორმით განცხადება მიიღება ამ დებულებით დადგენილი წესით, ამ მუხლში განსაზღვრული თავისებურებების გათვალისწინებით.

2. ელექტრონული ფორმით წარდგენილი განცხადების მიღება დასაშვებია, თუ განცხადება დადასტურებულია განმცხადებლის ციფრული ხელმოწერით ან ელექტრონული კომუნიკაცია იძლევა განმცხადებლისა და განცხადების მიღებისათვის უფლებამოსილი პირის პირდაპირი ვიზუალური კონტაქტის საშუალებას.

3. მოქალაქეობის საკითხის განხილვისათვის აუცილებელი დოკუმენტები მატერიალური ფორმით წარდგენილი უნდა იქნეს განცხადების ელექტრონული ფორმით რეგისტრაციიდან 20 დღეში.

4. უცხო სახელმწიფოში გაცემული დოკუმენტები შეიძლება მიღებულ იქნეს ელექტრონული ფორმით, დედნის წარდგენის გარეშე, თუ შესაძლებელია ამ დოკუმენტის აპოსტილით დამოწმების ან ლეგალიზაციის ფაქტის ნამდვილობის შემოწმება შესაბამისი ელექტრონული რეესტრის ან სხვა საშუალებით.



5. განმცხადებლის ვინაობასთან დაკავშირებით საფუძვლიანი ექვის წარმოშობის შემთხვევაში, სააგენტო უფლებამოსილია უარი განაცხადოს ამ მუხლით გათვალისწინებული წესით განცხადების მიღებას ან წარდგენილი განცხადების განხილვაზე. განცხადების მიღებამდე მომსახურების გაწევაზე უარის თქმა შესაძლებელია ზეპირი ფორმით, რაც უნდა დასტურდებოდეს ვიზუალური კონტაქტის ამსახველი ჩანაწერით.

6. სააგენტო უზრუნველყოფს ვიზუალური კონტაქტის ამსახველი ჩანაწერის ელექტრონული ფორმით მენახვას.

### თავი III

#### საქართველოს მოქალაქეობის საკითხთა განხილვის პროცედურა

##### მუხლი 17

1. კანონის მე-16 მუხლით გათვალისწინებული მოქალაქეობის ნატურალიზაციის გზით მინიჭებაზე უარის თქმის საფუძვლებს გასარკვევად სააგენტო ვალდებულია დაინტერესებული პირის/განმცხადებლის მიერ განცხადების შეტანიდან 3 დღეში მიმართოს საქართველოს შინაგან საქმეთა სამინისტროს, საქართველოს სახელმწიფო უსაფრთხოების სამსახურსა და საქართველოს დაზვერვის სამსახურს, ხოლო საქართველოს მოქალაქეობიდან გასვლის დამაბრკოლებელი გარემოებების არსებობის შესახებ ინფორმაციის გამოთხოვის მიზნით – საქართველოს ფინანსთა და შინაგან საქმეთა სამინისტროებს.

2. ამ მუხლის პირველი პუნქტით განსაზღვრული წესი არ ვრცელდება საქართველოს ტერიტორიაზე დაბადებული და საქართველოში 5 წლის განმავლობაში მცხოვრები ლტოლვილის სტატუსის მქონე ან საქართველოში სტატუსის მქონე მოქალაქეობის არმქონე არასრულწლოვანი პირისათვის ჩვეულებრივი წესით საქართველოს მოქალაქეობის მინიჭების შემთხვევებზე.

3. ამ მუხლის პირველი პუნქტით განსაზღვრული სახელმწიფო დაწესებულებები ვალდებული არიან წარუდგინონ სააგენტოს მოქალაქეობის საკითხის განხილვისათვის საჭირო ინფორმაცია შესაბამისი მოთხოვნის მიღებიდან 6 დღეში. თუ აღნიშნული ვადა საკმარისი არ არის ინფორმაციის წარსადგენად, შესაბამისი ორგანო ვალდებულია აღნიშნულის თაობაზე წერილობით აცნობოს სააგენტოს, რის შემდეგაც მას განესაზღვრება ორდღიანი დამატებითი ვადა.

4. ამ მუხლის მე-3 პუნქტით განსაზღვრულ ვადებში სახელმწიფო დაწესებულებების მიერ შესაბამისი ინფორმაციის წარმოუდგენლობის შემთხვევაში, ითვლება, რომ არ არსებობს საქართველოს მოქალაქეობის მინიჭების ან საქართველოს მოქალაქეობიდან გასვლის დამაბრკოლებელი გარემოებები. ამ შემთხვევაში, სააგენტო ვალდებულია დაასრულოს საკითხის განხილვა ამ დებულებით განსაზღვრულ ვადაში.

*საქართველოს პრეზიდენტის 2015 წლის 5 აგვისტოს ბრძანებულება №261 - ვებგვერდი, 06.08.2015წ.*

##### მუხლი 18

1. მოქალაქეობის საკითხთა განხილვის პროცესში სააგენტო ადგენს დაინტერესებული პირის სამართლებრივ კავშირს საქართველოსთან.

2. მოქალაქეობის საკითხთა განხილვის პროცესში სააგენტო უფლებამოსილია:

ა) მოიწვიოს განმცხადებელი ან დაინტერესებული პირი, წარდგინების შემტანი ორგანოს წარმომადგენელი, აგრეთვე პირი, რომლის მოწვევასაც შეიძლება მნიშვნელობა ჰქონდეს განსახილველ საქმესთან დაკავშირებული გარემოებების შესასწავლად, მიიღოს მათგან საკითხის განსახილველად საჭირო დოკუმენტაცია და ახსნა-განმარტება;

ბ) სახელმწიფო ან ადგილობრივი თვითმმართველობის ორგანოებიდან, ასევე სხვა ორგანიზაციებიდან მიიღოს აუცილებელი დოკუმენტაცია და წერილობითი დასკვნები განსახილველ საქმესთან დაკავშირებით.

##### მუხლი 19

1. კანონის მე-12, მე-14, მე-15 და 31-ე მუხლებით გათვალისწინებული საფუძვლებით საქართველოს მოქალაქეობის მოპოვების მსურველი პირი საკითხის განხილვის პროცესში გაივლის ტესტირებას ქართული ან აფხაზური ენის, აგრეთვე, დადგენილ ფარგლებში, საქართველოს ისტორიისა და სამართლის ძირითადი საფუძვლების ცოდნის შესაფასებლად. ხოლო საქართველოს მოქალაქეობის აღდგენის წესით მინიჭების მსურველი პირი - ქართული ან აფხაზური ენის ცოდნის შესაფასებლად. ტესტირების გავლას არ ექვემდებარება პირი, რომლის ქმედუუნარობის ან ფიზიკური ნაკლის გამო შეუძლებელია შემოწმდეს, აკმაყოფილებს თუ არა იგი აღნიშნულ მოთხოვნას.

2. დაინტერესებული პირის მიერ სახელმწიფო ენის, საქართველოს ისტორიისა და სამართლის ძირითადი საფუძვლების დადგენილ ფარგლებში ცოდნას აფასებს სააგენტოს მოქალაქეობის საკითხთა კომისია (შემდეგში – კომისია).

3. კომისია შედგება 4 წევრისაგან, რომლებსაც ნიშნავს სააგენტოს თავმჯდომარე. კომისიის ორი წევრი (მათ





შორის, კომისიის თავმჯდომარე) ინიშნება სააგენტოს თანამშრომელთაგან, ხოლო თითო-თითო წევრი – საქართველოს სახელმწიფო უსაფრთხოების სამსახურისა და საქართველოს პრეზიდენტის ადმინისტრაციის მოსამსახურეთაგან, ამავე უწყებების წარდგინებით.

4. კომისიის სხდომა უფლებამოსილია, თუ მას ესწრება წევრთა ნახევარზე მეტი. გადაწყვეტილება მიიღება ღია კენჭისყრით, სხდომაზე დამსწრე წევრების ხმათა უბრალო უმრავლესობით. ხმათა გაყოფის შემთხვევაში, გადაწყვეტია კომისიის თავმჯდომარის ხმა. კომისიის საქმიანობის წესი განისაზღვრება საქართველოს იუსტიციის მინისტრის ბრძანებით.

5. კომისია აფასებს პირის მიერ კანონით გათვალისწინებული სახელმწიფო ენის, საქართველოს ისტორიისა და სამართლის ძირითადი საფუძვლების დადგენილ ფარგლებში ცოდნის დონეს. სახელმწიფო ენის, საქართველოს ისტორიისა და სამართლის ძირითადი საფუძვლების დადგენილ ფარგლებში ცოდნის დონის შესამოწმებლად კომისია უფლებამოსილია მოიწვიოს შესაბამისი დარგის სპეციალისტები.

6. სახელმწიფო ენის, საქართველოს ისტორიისა და სამართლის ძირითადი საფუძვლების ცოდნის შეფასებისას კომისია იღებს ერთ-ერთ შემდეგ გადაწყვეტილებას:

- ა) ცოდნის დონე შეესაბამება საქართველოს მოქალაქეობის მოსაპოვებლად დადგენილ მოთხოვნებს;
- ბ) ცოდნის დონე არ შეესაბამება საქართველოს მოქალაქეობის მოსაპოვებლად დადგენილ მოთხოვნებს.

7. საგამონაკლისო წესით მოქალაქეობის მინიჭების საკითხის განხილვისას მოქალაქეობის მოპოვების მსურველი პირის მიმართ საქართველოს კონსტიტუციის მე-12 მუხლის მე-2 პუნქტით გათვალისწინებული პირობების არსებობას, საამისოდ მნიშვნელოვანი გარემოებების გათვალისწინებით, კომისია ადგენს შინაგანი რწმენის საფუძველზე.

*საქართველოს პრეზიდენტის 2015 წლის 5 აგვისტოს ბრძანებულება №261 - ვებგვერდი, 06.08.2015წ.*

**მუხლი 20**

1. საქართველოს სახელმწიფო უსაფრთხოების სამსახურიდან ან საქართველოს დაზვერვის სამსახურიდან მიღებული ინფორმაცია არ შეიძლება გახდეს საქართველოს მოქალაქეობის მინიჭებაზე უარის თქმის უპირობო საფუძველი. თუ საქართველოს შინაგან საქმეთა სამინისტროდან მოწოდებული ინფორმაციით პირის მიმართ არსებობს კანონის მე-16 მუხლის პირველი პუნქტის „ა“ და „ბ“ ქვეპუნქტებით გათვალისწინებული საფუძვლები, სააგენტო ამზადებს უარყოფით დასკვნას და 3 დღეში აცნობებს განმცხადებელს.

2. კანონის მე-16 მუხლის პირველი პუნქტის „გ“ ქვეპუნქტით გათვალისწინებული მოქალაქეობის მოპოვებაზე უარის თქმის პირობების არსებობის შემთხვევაში, სააგენტო ამზადებს უარყოფით დასკვნას და საბოლოო გადაწყვეტილების მისაღებად უგზავნის საქართველოს პრეზიდენტს. ასეთ შემთხვევაში, საქართველოს პრეზიდენტის დადებითი გადაწყვეტილება საჭიროებს დასაბუთებას.

3. შესაბამისი უწყებებიდან წარმოდგენილი ინფორმაციის მიხედვით, თუ პირის მიმართ არ არსებობს მოქალაქეობის მინიჭებაზე უარის თქმის საფუძვლები ან საქმის მასალების გადაგზავნიდან შესაბამის ვადაში არ იქნება წარმოდგენილი ინფორმაცია, ითვლება, რომ არ არსებობს საქართველოს მოქალაქეობის მინიჭების მსურველი პირის მიმართ კანონის მე-16 მუხლით გათვალისწინებული მოქალაქეობის მოპოვებაზე უარის თქმის საფუძვლები და საკითხის განხილვა გაგრძელდება ამ დებულებით დადგენილი წესის შესაბამისად.

4. საქართველოს სახელმწიფო უსაფრთხოების სამსახურიდან ან/და საქართველოს დაზვერვის სამსახურიდან საქართველოს მოქალაქეობის საგამონაკლისო წესით მინიჭების დამაბრკოლებელი გარემოებების არარსებობის შესახებ ინფორმაციის მიღების შემდეგ, აგრეთვე საქმის მასალების გადაგზავნიდან 10 დღეში ამ უწყებებიდან ინფორმაციის მიუღებლობის შემთხვევაში, კომისია იხილავს სხვა ქვეყნის მოქალაქის მიმართ საქართველოს კონსტიტუციის მე-12 მუხლის მე-2 პუნქტით გათვალისწინებული პირობების არსებობის საკითხს და იღებს გადაწყვეტილებას საქართველოს მოქალაქეობის საგამონაკლისო წესით მინიჭების პირობების არსებობის ან არარსებობის შესახებ. კომისიის გადაწყვეტილება ფორმდება ოქმის სახით.

5. თუ კომისია დაადგენს, რომ საქართველოს მოქალაქეობის საგამონაკლისო წესით მინიჭების მსურველი პირის მიმართ არ არსებობს საქართველოს კონსტიტუციის მე-12 მუხლის მე-2 პუნქტით გათვალისწინებული პირობები, სააგენტო ამზადებს უარყოფით დასკვნას და 3 დღეში აცნობებს განმცხადებელს, ხოლო თუ კომისიის მიერ დადგინდება საქართველოს კონსტიტუციის მე-12 მუხლის მე-2 პუნქტით გათვალისწინებული პირობების არსებობა, სააგენტოს მოტივირებული დასკვნა საბოლოო გადაწყვეტილების მისაღებად უგზავნება საქართველოს პრეზიდენტს.



6. კანონის მე-12, მე-14, მე-15 და 31-ე მუხლებით გათვალისწინებული მოქალაქეობის მინიჭების მსურველი პირის მიმართ სახელმწიფო ენის, საქართველოს ისტორიისა და სამართლის ძირითადი საფუძვლების ცოდნის დადგენისას, თუ კომისია მიიჩნევს, რომ მოქალაქეობის მსურველი პირის ცოდნის დონე არ შეესაბამება დადგენილ მოთხოვნებს, სააგენტოს უარყოფითი დასკვნა 3 დღეში ეცნობება განმცხადებელს.

7. სააგენტოს მოტივირებული დასკვნა პირის მიერ საქართველოს მოქალაქეობის მინიჭების, საქართველოს მოქალაქეობიდან გასვლის და საქართველოს მოქალაქეობის დაკარგვის კანონით დადგენილი საფუძვლების არსებობის შესახებ ეგზავნება საქართველოს პრეზიდენტს.

*საქართველოს პრეზიდენტის 2015 წლის 5 აგვისტოს ბრძანებულება №261 - ვებგვერდი, 06.08.2015წ.*

### **მუხლი 21**

1. საქართველოს მოქალაქეობიდან გასვლისა და საქართველოს მოქალაქეობის დაკარგვის თაობაზე უარყოფითი გადაწყვეტილების მიღების შემთხვევაში, სააგენტოს მოტივირებული დასკვნა განმცხადებელს ეგზავნება 3 დღეში.

2. საქართველოს მოქალაქეობის მინიჭების, საქართველოს მოქალაქეობიდან გასვლისა და საქართველოს მოქალაქეობის დაკარგვის შესახებ გადაწყვეტილებას სააგენტოს მიერ წარდგენილი დასკვნის საფუძველზე იღებს საქართველოს პრეზიდენტი.

3. საქართველოს მოქალაქეობის მინიჭების, საქართველოს მოქალაქეობიდან გასვლის, საქართველოს მოქალაქეობის დაკარგვის თაობაზე განცხადებისა და წარდგინების დაკმაყოფილების შემთხვევაში, საქართველოს პრეზიდენტი გამოსცემს ბრძანებულებას, ხოლო უარყოფითი გადაწყვეტილების მიღების შემთხვევაში – განკარგულებას.

4. სხვა ქვეყნის მოქალაქისათვის საქართველოს მოქალაქეობის მინიჭების შესახებ (საგამონაკლისო წესით საქართველოს მოქალაქეობის მინიჭების გარდა) საქართველოს პრეზიდენტის ბრძანებულება ძალაში შედის უფლებამოსილი ორგანოების მიერ ამ პირის სხვა ქვეყნის მოქალაქეობიდან გასვლის დამადასტურებელი დოკუმენტის მიღებისთანავე.

5. საქართველოს მოქალაქეობიდან პირის გასვლის შესახებ საქართველოს პრეზიდენტის ბრძანებულება ძალაში შედის:

ა) პირის მიერ სხვა ქვეყნის მოქალაქეობის მიღების დამადასტურებელი დოკუმენტის სააგენტოსათვის წარდგენისთანავე;

ბ) ხელმოწერიდან მე-15 დღეს, თუ წარმოდგენილი სხვა ქვეყნის კომპეტენტური ორგანოს მიერ გაცემული დოკუმენტით ცალსახად დასტურდება, რომ პირს საქართველოს მოქალაქეობიდან გასვლის შემთხვევაში აუცილებლად მიენიჭება შესაბამისი ქვეყნის მოქალაქეობა.

6. ადმინისტრაციული ორგანოები ვალდებული არიან სააგენტოს დაუყოვნებლივ აცნობონ პირის მიმართ საქართველოს მოქალაქეობიდან გასვლის შესახებ საქართველოს პრეზიდენტის ბრძანებულების ამოქმედების ამ მუხლის მე-5 პუნქტის „ა“ ქვეპუნქტით განსაზღვრული გარემოების არსებობის თაობაზე და სხვა ქვეყნის მოქალაქეობის დამადასტურებელი დოკუმენტის მიღებიდან 5 დღეში უზრუნველყონ მისი გადაგზავნა სააგენტოში.

7. შესაბამისი სამართლებრივი აქტის პროექტის საქართველოს პრეზიდენტისათვის წარდგენიდან ერთი კვირაში ბრძანებულების გამოუცემლობა ჩაითვლება საქართველოს მოქალაქეობის საკითხის დაკმაყოფილებაზე უარის თქმად.

8. მოქალაქეობის საკითხის დაკმაყოფილებაზე უარის თქმად ჩაითვლება ასევე საქართველოს პრეზიდენტის მიერ სააგენტოდან წარმოდგენილი უარყოფითი დასკვნების გაცნობიდან ერთ კვირაში სამართლებრივი აქტის გამოუცემლობა.

### **მუხლი 22**

1. პირი, რომელიც ნატურალიზაციით მოიპოვებს საქართველოს მოქალაქეობას, გარდა კანონის მე-12 მუხლის მე-2 და მე-3 პუნქტებით გათვალისწინებული შემთხვევებისა, საქართველოს მოქალაქის პირადობის დამადასტურებელი დოკუმენტის გაცემისას ხელს აწერს საქართველოს ერთგულების ფიცის ტექსტს (დანართი №7).

2. ხელმოწერილი ფიცის ტექსტი ეგზავნება სააგენტოს, რომელიც უზრუნველყოფს მის შენახვას შესაბამისი პირისათვის საქართველოს მოქალაქეობის მინიჭების საქმის მასალებთან ერთად.

### **მუხლი 23**

საქართველოს მოქალაქეობის საკითხებზე სააგენტოს დასკვნა, რომელიც დამოუკიდებლად წარმოშობს





სამართლებრივ შედეგებს, და საქართველოს პრეზიდენტის გადაწყვეტილება, გარდა საგამონაკლისო წესით მოქალაქეობის მინიჭებაზე უარყოფითი გადაწყვეტილებისა, შეიძლება გასაჩივრდეს სასამართლოში, საქართველოს კანონმდებლობით დადგენილი წესით.

#### **მუხლი 24**

საქართველოს მოქალაქეობის ნატურალიზაციით მოპოვების შესახებ განცხადებაზე უარყოფითი გადაწყვეტილების მიღების შემთხვევაში, პირს უფლება აქვს იმავე საფუძველზე მიმართოს უფლებამოსილ ორგანოს უარყოფითი გადაწყვეტილების მიღებიდან 6 თვის შემდეგ.

### **თავი IV**

#### **დაბადებით საქართველოს მოქალაქეობის მოპოვება**

#### **მუხლი 25**

1. საქართველოს მოქალაქეობას დაბადებით მოიპოვებს:

ა) პირი, რომლის დაბადების მომენტისათვის მისი ერთ-ერთი მშობელი საქართველოს მოქალაქეა;

ბ) საქართველოს ტერიტორიაზე ექსტრაკორპორული განაყოფიერების შედეგად (სუროგაციით) დაბადებული პირი, თუ მისი არც ერთი მშობლის მოქალაქეობის ქვეყანა მას საკუთარ მოქალაქედ არ მიიჩნევს;

გ) საქართველოში სტატუსის მქონე მოქალაქეობის არმქონე პირთა შვილი, რომელიც საქართველოს ტერიტორიაზე დაიბადა;

დ) საქართველოს ტერიტორიაზე დაბადებული პირი, რომლის ერთ-ერთი მშობელი საქართველოში სტატუსის მქონე მოქალაქეობის არმქონე პირია, ხოლო მეორე მშობელი უცნობია.

2. ამ მუხლის პირველი პუნქტის „ბ“ ქვეპუნქტის საფუძველზე პირის მიერ დაბადებით საქართველოს მოქალაქეობის მოსაპოვებლად წარმოდგენილი უნდა იქნეს ამ პირის მშობლ(ებ)ის მოქალაქეობის ქვეყნის კომპეტენტური ორგანოს მიერ გაცემული უარი ამ პირის საკუთარ მოქალაქედ მიჩნევის თაობაზე.

3. საქართველოს მოქალაქეობის დაბადებით მოპოვების საკითხის განხილვისას, თუ სააგენტოში არ მოიპოვება მონაცემი ამ პირის საქართველოსადმი ან სხვა ქვეყნისადმი კუთვნილების შესახებ, სააგენტო უფლებამოსილია სხვა ქვეყნის კომპეტენტური ორგანოდან გამოითხოვოს ინფორმაცია პირის მოქალაქეობრივი კუთვნილების შესახებ. საქართველოსთან პირის სამართლებრივი კავშირის თაობაზე ადმინისტრაციული წარმოების ვადების დასრულებამდე ინფორმაციის მიუღებლობის შემთხვევაში, ითვლება, რომ დაინტერესებული პირი არ არის სხვა ქვეყნის მოქალაქე და საწინააღმდეგოს დადგენამდე მიიჩნევა საქართველოს მოქალაქედ.

### **თავი V**

#### **საქართველოს მოქალაქეობის ჩვეულებრივი წესით მინიჭება**

#### **მუხლი 26**

1. პირს, რომელსაც საქართველოს მოქალაქეობა დაბადებით არ მოუპოვებია, საქართველოს მოქალაქეობა ჩვეულებრივი წესით მიენიჭება, თუ:

ა) კანონიერ საფუძველზე უწყვეტად ცხოვრობს საქართველოში საქართველოს მოქალაქეობის მინიჭების შესახებ განცხადების წარდგენის დღემდე ბოლო 5 წლის განმავლობაში;

ბ) დადგენილ ფარგლებში იცის საქართველოს სახელმწიფო ენა;

გ) დადგენილ ფარგლებში იცის საქართველოს ისტორია და სამართლის ძირითადი საფუძველები;

დ) მუშაობს ან/და აქვს უძრავი ქონება საქართველოში ან საქართველოს ტერიტორიაზე ახორციელებს სამეწარმეო საქმიანობას ან საქართველოს საწარმოში ფლობს წილს ან აქციებს.

2. საქართველოს მოქალაქეობის ჩვეულებრივი წესით მინიჭების მსურველმა პირმა უფლებამოსილ ორგანოში უნდა წარადგინოს:

ა) დაბადების მოწმობის ასლი (თუ მოქალაქეობის ჩვეულებრივი წესით მინიჭების მსურველი პირი დაბადებულია საზღვარგარეთ და ფლობს აღნიშნულ დოკუმენტს);

ბ) ბოლო 5 წლის განმავლობაში საქართველოს ტერიტორიაზე კანონიერ საფუძველზე უწყვეტად ცხოვრების დამადასტურებელი დოკუმენტი (ვიზა, ბინადრობის ნებართვა ან მოწმობა, საქართველოს სახელმწიფო საზღვრის გადმოკვეთის დამადასტურებელი თარიღ-დამდა);



გ) საქართველოში სამუშაო ადგილის ან/და უძრავი ქონების, ან საქართველოს ტერიტორიაზე სამეწარმეო საქმიანობის, ან/და საქართველოს საწარმოში წილის ან აქციების ფლობის დამადასტურებელი დოკუმენტი.

3. საქართველოს მოქალაქეობის ჩვეულებრივი წესით მინიჭების მსურველმა ლტოლვილის სტატუსის ან საქართველოში მოქალაქეობის არმქონე პირის სტატუსის მქონე პირმა უფლებამოსილ ორგანოში უნდა წარადგინოს:

ა) დაბადების მოწმობის ასლი (თუ მოქალაქეობის ჩვეულებრივი წესით მინიჭების მსურველი პირი დაბადებულია საზღვარგარეთ და ფლობს აღნიშნულ დოკუმენტს);

ბ) ბოლო 5 წლის განმავლობაში საქართველოს ტერიტორიაზე კანონიერ საფუძველზე უწყვეტად ცხოვრების დამადასტურებელი დოკუმენტი - ბინადრობის მოწმობა.

#### **მუხლი 27**

1. არასრულწლოვან პირს, რომელსაც საქართველოს მოქალაქეობა დაბადებით არ მოუპოვებია, საქართველოს მოქალაქეობა ჩვეულებრივი წესით მიენიჭება, თუ მისი ერთ-ერთი მშობელი საქართველოს მოქალაქეა.

2. არასრულწლოვან პირს საქართველოს მოქალაქეობა ჩვეულებრივი წესით მიენიჭება, თუ იგი საქართველოს მოქალაქემ შვილად აიყვანა.

3. საქართველოს ტერიტორიაზე დაბადებულ ლტოლვილის სტატუსის მქონე ან საქართველოში სტატუსის მქონე მოქალაქეობის არმქონე არასრულწლოვან პირს, რომელიც 5 წელია ცხოვრობს საქართველოში, საქართველოს მოქალაქეობა მიენიჭება ჩვეულებრივი წესით.

4. ამ მუხლის პირველი პუნქტის შესაბამისად არასრულწლოვანი პირისათვის საქართველოს მოქალაქეობის ჩვეულებრივი წესით მინიჭებისათვის უფლებამოსილ ორგანოში წარდგენილი უნდა იქნეს:

ა) მშობლის საქართველოს მოქალაქეობის დამადასტურებელი დოკუმენტი;

ბ) დაბადების მოწმობის ასლი, თუ არასრულწლოვანი დაბადებულია საზღვარგარეთ.

5. ამ მუხლის მე-2 პუნქტის შესაბამისად არასრულწლოვანი პირისათვის საქართველოს მოქალაქეობის მისანიჭებლად უფლებამოსილ ორგანოში წარდგენილი უნდა იქნეს:

ა) მშვილელის საქართველოს მოქალაქეობის დამადასტურებელი დოკუმენტი;

ბ) დაინტერესებული პირის შვილად აყვანის დამადასტურებელი დოკუმენტი.

6. ამ მუხლის მე-3 პუნქტის შესაბამისად არასრულწლოვანი პირისათვის საქართველოს მოქალაქეობის მისანიჭებლად უფლებამოსილ ორგანოში წარდგენილი უნდა იქნეს:

ა) 5 წლის განმავლობაში საქართველოს ტერიტორიაზე ცხოვრების დამადასტურებელი დოკუმენტი;

ბ) არასრულწლოვნის ლტოლვილის სტატუსის ან საქართველოში სტატუსის მქონე პირის დამადასტურებელი დოკუმენტი;

გ) ლტოლვილის სტატუსის დადგენის შესახებ განაცხადის რეგისტრაციის დამადასტურებელი დოკუმენტი.

7. ამ მუხლის მე-3 პუნქტით გათვალისწინებულ შემთხვევაში, საქართველოს ტერიტორიაზე ცხოვრების ვადა აითვლება ლტოლვილის სტატუსის დადგენის შესახებ განაცხადების რეგისტრაციის დღიდან.

#### **მუხლი 28**

1. სხვა ქვეყნის მოქალაქეს უფლება აქვს მიმართოს უფლებამოსილ ორგანოს საქართველოს მოქალაქეობის ჩვეულებრივი წესით მინიჭების მოთხოვნით. სხვა ქვეყნის მოქალაქისათვის საქართველოს მოქალაქეობის მინიჭების შესახებ საქართველოს პრეზიდენტის ბრძანებულება ძალაში შედის საქართველოს კომპეტენტური ორგანოების მიერ ამ პირის სხვა ქვეყნის მოქალაქეობიდან გასვლის დამადასტურებელი დოკუმენტის მიღებისთანავე.

2. სხვა ქვეყნის მოქალაქემ, საქართველოს მოქალაქეობის ჩვეულებრივი წესით მინიჭების სურვილის შემთხვევაში, უფლებამოსილ ორგანოში უნდა წარადგინოს:

ა) დაბადების მოწმობის ასლი (თუ მოქალაქეობის მინიჭების მსურველი პირი დაბადებულია საზღვარგარეთ და ფლობს აღნიშნულ დოკუმენტს);



ბ) სხვა ქვეყნის მოქალაქეობის დამადასტურებელი დოკუმენტი (პირადობის დამადასტურებელი მოწმობა, პასპორტი ან სხვა ქვეყნის კომპეტენტური ორგანოს მიერ გაცემული ცნობა მოქალაქეობის შესახებ);

გ) ბოლო 5 წლის განმავლობაში საქართველოში კანონიერ საფუძველზე უწყვეტად ცხოვრების დამადასტურებელი დოკუმენტი (ვიზა, ბინადრობის ნებართვა ან მოწმობა, საქართველოს სახელმწიფო საზღვრის გადმოკვეთის დამადასტურებელი თარიღ-დამდა);

დ) საქართველოში სამუშაო ადგილის ან/და უძრავი ქონების, ან საქართველოს ტერიტორიაზე სამეწარმეო საქმიანობის, ან/და საქართველოს საწარმოში წილის ან აქციების ფლობის დამადასტურებელი დოკუმენტი.

### **მუხლი 29**

მოქალაქეობის მინიჭების საქმისწარმოებისას სააგენტო ვალდებულია სააგენტოს ერთიან რეესტრში გადაამოწმოს დაინტერესებული პირის მიერ საქართველოს ტერიტორიაზე კანონით დადგენილ ვადაში უწყვეტად ცხოვრების ფაქტი.

## **თავი VI**

### **საქართველოს მოქალაქეობის გამარტივებული წესით მინიჭების საკითხთა განხილვის წესი**

#### **მუხლი 30**

1. საქართველოს მოქალაქეზე დაქორწინებულ პირს, რომელიც საქართველოს მოქალაქეობის მინიჭების შესახებ განცხადების წარდგენის დღემდე ბოლო 2 წლის განმავლობაში კანონიერ საფუძველზე უწყვეტად ცხოვრობს საქართველოში, საქართველოს მოქალაქეობა გამარტივებული წესით მიენიჭება, თუ:

ა) დადგენილ ფარგლებში იცის საქართველოს სახელმწიფო ენა;

ბ) დადგენილ ფარგლებში იცის საქართველოს ისტორია და სამართლის ძირითადი საფუძვლები.

2. საქართველოს მოქალაქეობის გამარტივებული წესით მინიჭების მსურველმა პირმა უფლებამოსილ ორგანოში უნდა წარადგინოს:

ა) დაბადების მოწმობის ასლი (თუ მოქალაქეობის მინიჭების მსურველი პირი დაბადებულია საზღვარგარეთ და აქვს აღნიშნული დოკუმენტი);

ბ) საქართველოს მოქალაქესთან ქორწინების დამადასტურებელი დოკუმენტის (ქორწინების მოწმობა ან სასამართლოს გადაწყვეტილება შესაბამისი იურიდიული ფაქტის დადგენის შესახებ) ასლი;

გ) მეუღლის საქართველოს მოქალაქეობის დამადასტურებელი დოკუმენტის ასლი;

დ) საქართველოს ტერიტორიაზე ბოლო 2 წლის განმავლობაში კანონიერ საფუძველზე უწყვეტად ცხოვრების დამადასტურებელი დოკუმენტი (ვიზა, ბინადრობის ნებართვა ან მოწმობა, საქართველოს სახელმწიფო საზღვრის გადმოკვეთის დამადასტურებელი თარიღ-დამდა).

3. მოქალაქეობის გამარტივებული წესით მინიჭების შესახებ განცხადების წარდგენისას განმცხადებელი ვალდებულია თან იქონიოს და მოთხოვნისთანავე წარმოადგინოს პირადობის დამადასტურებელი დოკუმენტები (პირადობის (ბინადრობის) მოწმობა, პასპორტი).

#### **მუხლი 31**

1. საქართველოში რეპატრიანტის სტატუსის მქონე პირს რეპატრიანტის სტატუსის მინიჭებიდან 2 წლის განმავლობაში შეუძლია განცხადებით მიმართოს უფლებამოსილ ორგანოს გამარტივებული წესით მოქალაქეობის მინიჭების მოთხოვნით და უნდა წარადგინოს შემდეგი დოკუმენტაცია:

ა) დაბადების მოწმობის ასლი (თუ მოქალაქეობის მინიჭების მსურველი პირი არასრულწლოვანია, დაბადებულია საზღვარგარეთ);

ბ) რეპატრიანტის სტატუსის დამადასტურებელი დოკუმენტი.

2. იმ შემთხვევაში, თუ რეპატრიანტის სტატუსის მქონე პირი არ ფლობს ქართულ ან ინგლისურ ენას და არ იმყოფება საქართველოში, საქართველოს ოკუპირებული ტერიტორიებიდან იძულებით გადაადგილებულ პირთა, განსახლებისა და ლტოლვილთა სამინისტრო უზრუნველყოფს საქართველოს მოქალაქეობის გამარტივებული წესით მინიჭების შესახებ განცხადების შევსებას ელექტრონულ მონაცემთა ბაზაში არსებული ინფორმაციის საფუძველზე და განცხადებას ელექტრონული ფორმით უგზავნის საქართველოს საგარეო საქმეთა სამინისტროს, რომელიც უზრუნველყოფს მის მიწოდებას საზღვარგარეთ საქართველოს შესაბამისი დიპლომატიური წარმომადგენლობის ან საკონსულო დაწესებულებებისათვის.



3. საქართველოს მოქალაქეობის გამარტივებული წესით მინიჭების შესახებ ბრძანებულების გამოცემიდან ორი წლის ვადაში რეპატრიანტის სტატუსის მქონე პირმა სააგენტოს ან საზღვარგარეთ საქართველოს დიპლომატიურ წარმომადგენლობას ან საკონსულო დაწესებულებას უნდა წარუდგინოს სხვა ქვეყნის მოქალაქეობიდან გასვლის დამადასტურებელი ოფიციალური დოკუმენტი. აღნიშნულ ვადაში სხვა ქვეყნის მოქალაქეობიდან გასვლის დამადასტურებელი ოფიციალური დოკუმენტის არასაპატიო მიზეზით წარუდგენლობის შემთხვევაში, საქართველოს პრეზიდენტის ბრძანებულება ითვლება ძალადაკარგულად.

4. ამ მუხლის პირველი და მე-3 პუნქტებით გათვალისწინებული ვადის არასაპატიო მიზეზით დარღვევის შემთხვევაში, რეპატრიანტის სტატუსის მქონე პირი საქართველოს მოქალაქეობას გამარტივებული წესით ვეღარ მიიღებს.

## თავი VII

### საქართველოს მოქალაქეობის საგამონაკლისო წესით მინიჭების საკითხის განხილვის წესი

#### მუხლი 32

1. საქართველოს კონსტიტუციის მე-12 მუხლის მე-2 პუნქტის შესაბამისად, საქართველოს პრეზიდენტმა საქართველოს მოქალაქეობა საგამონაკლისო წესით შეიძლება მიანიჭოს სხვა ქვეყნის მოქალაქეს, რომელსაც საქართველოს წინაშე განსაკუთრებული დამსახურება აქვს ან რომლისათვისაც საქართველოს მოქალაქეობის მინიჭება გამომდინარეობს სახელმწიფო ინტერესებიდან.

2. საქართველოს მოქალაქეობის საგამონაკლისო წესით მინიჭების საკითხის განსახილველად სხვა ქვეყნის მოქალაქის განცხადებას თან უნდა ერთოდეს:

ა) დაბადების მოწმობის ასლი (თუ მოქალაქეობის მინიჭების მსურველი დაბადებულია საზღვარგარეთ და აქვს აღნიშნული დოკუმენტი), ხოლო არასრულწლოვანი პირისათვის საქართველოს მოქალაქეობის მინიჭების შემთხვევაში – პირის დაბადების მოწმობის ასლი და მისი კანონიერი წარმომადგენლის წერილობითი თანხმობა;

ბ) პასპორტი ან მოქალაქეობისა და პირადობის დამადასტურებელი სხვა დოკუმენტი;

გ) საქართველოს მოქალაქის ან საქართველოში რეგისტრირებული იურიდიული პირის არანაკლებ 2 რეკომენდაცია სხვა ქვეყნის მოქალაქისათვის საქართველოს მოქალაქეობის მინიჭების შესახებ.

3. სხვა ქვეყნის მოქალაქისათვის საქართველოს მოქალაქეობის მინიჭების თაობაზე რეკომენდაციის გაცემის უფლება არა აქვს ადმინისტრაციული ორგანოს იმ თანამშრომელს, რომელიც მონაწილეობს ან/და უშუალო კავშირი აქვს მოქალაქეობის მინიჭებასთან დაკავშირებულ ადმინისტრაციულ წარმოებასთან.

#### მუხლი 33

1. საქართველოს მოქალაქეობის საგამონაკლისო წესით მინიჭების მიზანშეწონილობის საკითხის განხილვისას საქმისათვის მნიშვნელოვანი გარემოებების დადგენის მიზნით კომისია უფლებამოსილია სხვა ქვეყნის მოქალაქე მოიწვიოს გასაუბრებაზე. საჭიროების შემთხვევაში, გასაუბრება შეიძლება ჩატარდეს სატელეფონო კავშირის ან ელექტრონული კომუნიკაციის მეშვეობით. საქმისათვის მნიშვნელოვანი გარემოებების დასადგენად, გასაუბრებაზე შეიძლება აგრეთვე მოწვეულ იქნეს სხვა პირი, გამოთხოვილ იქნეს დოკუმენტები და ინფორმაცია სხვადასხვა დაწესებულებისა და ორგანიზაციიდან.

2. საქართველოს კონსტიტუციის მე-12 მუხლის მე-2 პუნქტით განსაზღვრული პირობების არსებობის დადგენისას კომისია იღებს ერთ-ერთ შემდეგ გადაწყვეტილებას:

ა) ადგენს, რომ პირის მიმართ არსებობს საქართველოს კონსტიტუციის მე-12 მუხლის მე-2 პუნქტის პირობები;

ბ) ადგენს, რომ პირის მიმართ არ არსებობს საქართველოს კონსტიტუციის მე-12 მუხლის მე-2 პუნქტის პირობები.

#### მუხლი 34

1. სააგენტო საქართველოს შინაგან საქმეთა სამინისტროდან, საქართველოს სახელმწიფო უსაფრთხოების სამსახურიდან ან/და საქართველოს დაზვერვის სამსახურიდან მიღებულ ინფორმაციასა და კომისიის ოქმზე დაყრდნობით ამზადებს დასკვნას:

ა) სხვა ქვეყნის მოქალაქისათვის საქართველოს მოქალაქეობის მინიჭების მიზანშეწონილობის შესახებ;

ბ) სხვა ქვეყნის მოქალაქისათვის საქართველოს მოქალაქეობის მინიჭების მიზანშეწონილობის შესახებ;

გ) სხვა ქვეყნის მოქალაქისათვის საქართველოს მოქალაქეობის საგამონაკლისო წესით მინიჭების საკითხის საქართველოს კონსტიტუციის მე-12 მუხლის მე-2 პუნქტით განსაზღვრულ პირობებთან შეუსაბამობის შესახებ.



2. იმ შემთხვევაში, თუ სააგენტო დაადგენს, რომ პირი არის საქართველოს მოქალაქე და არსებობს საქართველოს კანონმდებლობით გათვალისწინებული საქართველოს მოქალაქეობის დაკარგვის საფუძველი, სააგენტო იწყებს წარმოებას და ამზადებს ერთიან დასკვნას სხვა ქვეყნის მოქალაქისათვის საქართველოს მოქალაქეობის დაკარგვისა და იმავდროულად საქართველოს მოქალაქეობის საგამონაკლისო წესით მინიჭების შესახებ.

3. სააგენტო ამ მუხლის პირველი პუნქტის „ა“ და „ბ“ ქვეპუნქტებით განსაზღვრულ დასკვნას საქმის მსალებთან ერთად (მოქალაქეობის საგამონაკლისო წესით მინიჭებით დაინტერესებული პირის განცხადებას, კომისიის ოქმს, სხვა ქვეყნის მოქალაქეობის დამადასტურებელ დოკუმენტს, ხოლო ამ მუხლის პირველი პუნქტის „ა“ ქვეპუნქტით განსაზღვრულ დასკვნასთან ერთად, ასევე საქართველოს სახელმწიფო უსაფრთხოების სამსახურიდან ან/და საქართველოს დაზვერვის სამსახურიდან მიღებულ ინფორმაციას კანონის მე-16 მუხლის პირველი პუნქტის „გ“ ქვეპუნქტით განსაზღვრული საფუძვლების არსებობის შესახებ) აწვდის საქართველოს პრეზიდენტს საბოლოო გადაწყვეტილების მისაღებად.

4. შესაბამისი დასკვნების საფუძველზე საქართველოს მოქალაქეობის საკითხებზე საქართველოს პრეზიდენტის სამართლებრივი აქტების პროექტების მომზადებას უზრუნველყოფს საქართველოს პრეზიდენტის ადმინისტრაციის დაჯილდოების, მოქალაქეობისა და შეწყალების საკითხთა დეპარტამენტი (შემდგომში - დეპარტამენტი).

5. სააგენტოს მიერ საქართველოს პრეზიდენტისთვის კანონის 21-ე მუხლით გათვალისწინებული საფუძვლებით სხვა ქვეყნის მოქალაქისათვის საქართველოს მოქალაქეობის დაკარგვისა და იმავდროულად საქართველოს მოქალაქეობის მინიჭების შესახებ დასკვნის წარდგენისას, სხვა ქვეყნის მოქალაქის განცხადების დაკმაყოფილების შემთხვევაში, საქართველოს პრეზიდენტი გამოსცემს ბრძანებულებას სხვა ქვეყნის მოქალაქისათვის საქართველოს მოქალაქეობის შეწყვეტისა და იმავდროულად საქართველოს მოქალაქეობის საგამონაკლისო წესით მინიჭების შესახებ.

*საქართველოს პრეზიდენტის 2015 წლის 5 აგვისტოს ბრძანებულება №261 - ვებგვერდი, 06.08.2015წ.*

## თავი VIII

### საქართველოს მოქალაქეობის საგამონაკლისო წესით მინიჭების პროცედურა საქართველოს პრეზიდენტის ინიციატივით

#### მუხლი 35

1. საქართველოს კონსტიტუციის მე-12 მუხლის მე-2 პუნქტისა და კანონის 25-ე მუხლის მე-2 პუნქტის შესაბამისად, საქართველოს პრეზიდენტის მიერ საგამონაკლისო წესით, კანონით გათვალისწინებული პროცედურის დაუცველად, საქართველოს მოქალაქეობა შეიძლება მიენიჭოს უცხო ქვეყნის მოქალაქეს, რომელსაც საქართველოს წინაშე აქვს დამსახურება ან რომლისთვისაც საქართველოს მოქალაქეობის მინიჭება გამომდინარეობს სახელმწიფო ინტერესებიდან.

2. საქართველოს პრეზიდენტის გადაწყვეტილება უცხო ქვეყნის მოქალაქისათვის საქართველოს მოქალაქეობის მინიჭების შესახებ საჭიროებს მოქალაქეობის მინიჭების მიზეზების დასაბუთებას.

#### მუხლი 36

1. საქართველოს პრეზიდენტი საკუთარი ინიციატივით, საგამონაკლისო წესით, უცხო ქვეყნის მოქალაქეს საქართველოს მოქალაქეობას ანიჭებს უცხო ქვეყნის მოქალაქეობის დამადასტურებელი დოკუმენტისა და მოტივირებული პირადი განცხადების საფუძველზე.

2. უცხო ქვეყნის მოქალაქის საქართველოსთან სამართლებრივი კავშირის არსებობის თაობაზე საფუძვლიანი ეჭვის შემთხვევაში, დეპარტამენტი უფლებამოსილია სააგენტოს მიმართოს პირის საქართველოსთან სამართლებრივი კავშირის დადგენის მოთხოვნით. სააგენტო შესაბამის დასკვნას წარმოადგენს მიმართვიდან არა უგვიანეს 3 დღისა.

3. პირის საქართველოსთან სამართლებრივი კავშირის დადგენის შემთხვევაში, საქართველოს პრეზიდენტი გამოსცემს ბრძანებულებას სხვა ქვეყნის მოქალაქისათვის საქართველოს მოქალაქეობის შეწყვეტისა და იმავდროულად საქართველოს მოქალაქეობის საგამონაკლისო წესით მინიჭების შესახებ.

4. ამ თავით გათვალისწინებული მოქალაქეობის მინიჭების შესახებ გადაწყვეტილების მიღების ვადა არ აღემატება 1 თვეს ამ მუხლის პირველი პუნქტით გათვალისწინებული დოკუმენტების საქართველოს პრეზიდენტის ადმინისტრაციაში რეგისტრაციის მომენტიდან.

*საქართველოს პრეზიდენტის 2014 წლის 17 ოქტომბრის ბრძანებულება №429 - ვებგვერდი, 17.10.2014წ.*

## თავი IX

### საქართველოს მოქალაქეობის აღდგენის წესით მინიჭების საკითხთა განხილვის წესი



## **მუხლი 37**

1. საქართველოს მოქალაქეობა აღდგენის წესით მიენიჭება პირს, რომელსაც საქართველოს მოქალაქეობა შეუწყდა:

ა) არამართლზომიერად;

ბ) საქართველოს მოქალაქეობიდან გასვლით;

გ) მშობლის/მშობლების არჩევნის შედეგად.

2. საქართველოს მოქალაქეობის აღდგენის წესით მინიჭებისას სავალდებულოა, რომ:

ა) პირმა დადგენილ ფარგლებში იცოდეს საქართველოს სახელმწიფო ენა;

ბ) პირის მიმართ არ არსებობდეს კანონის მე-16 მუხლით გათვალისწინებული საფუძველები.

3. საქართველოს მოქალაქეობის აღდგენის წესით საქართველოს მოქალაქეობის მინიჭების საკითხის განსახილველად განმცხადებელმა უფლებამოსილ ორგანოში უნდა წარადგინოს, შესაბამისად:

ა) იმ დოკუმენტების ასლები, რომლებითაც დასტურდება, რომ დაინტერესებული პირი კანონის შესაბამისად ითვლებოდა საქართველოს მოქალაქედ;

ბ) საქართველოს მოქალაქეობის არამართლზომიერად შეწყვეტის დამადასტურებელი დოკუმენტი;

გ) საქართველოს მოქალაქეობიდან გასვლის დამადასტურებელი დოკუმენტი;

დ) მშობლების არჩევნის შედეგად მოქალაქეობის შეწყვეტის დამადასტურებელი დოკუმენტი.

4. მშობლის/მშობლების არჩევნის შედეგად საქართველოს მოქალაქეობის შეწყვეტის საფუძველით საქართველოს მოქალაქეობა აღდგენის წესით პირს შეიძლება მიენიჭოს მის მიერ სრულწლოვანების მიღწევისას.

5. საქართველოს მოქალაქეობა არამართლზომიერად შეწყვეტილად მიიჩნევა, თუ პირი საქართველოს მოქალაქეობას დაკარგავს კანონით გათვალისწინებული საფუძველების არსებობის გარეშე. საქართველოს მოქალაქეობის არამართლზომიერად შეწყვეტის საფუძველით საქართველოს მოქალაქეობის აღდგენის წესით მინიჭებაზე არ ვრცელდება კანონის მე-18 მუხლის მე-2 პუნქტის მოთხოვნები.

6. კანონის მე-18 მუხლის მე-2 პუნქტის „ა“ ქვეპუნქტის მოთხოვნა არ ვრცელდება პირისათვის საქართველოს მოქალაქეობის აღდგენის წესით მინიჭებაზე, თუ პირის ფიზიკური ნაკლის გამო შეუძლებელია შემოწმდეს, აკმაყოფილებს თუ არა იგი აღნიშნული ქვეპუნქტის მოთხოვნას.

7. თუ აღდგენის წესით საქართველოს მოქალაქეობის მინიჭებით დაინტერესებული პირი სხვა ქვეყნის მოქალაქეა, ამ მუხლის მე-3 პუნქტით განსაზღვრული ერთ-ერთი დოკუმენტის გარდა, სააგენტოში წარდგენილი უნდა იქნეს მისი მოქალაქეობის დამადასტურებელი დოკუმენტი.

## **თავი X**

### **საქართველოს მოქალაქეობიდან გასვლისა და საქართველოს მოქალაქეობის დაკარგვის საკითხთა განხილვის წესი**

## **მუხლი 38**

1. საქართველოს მოქალაქეს საქართველოს მოქალაქეობა შეუწყდება:

ა) საქართველოს მოქალაქეობიდან გასვლით;

ბ) საქართველოს მოქალაქეობის დაკარგვით;

გ) კანონის მე-11 მუხლით გათვალისწინებულ შემთხვევაში.

2. არასრულწლოვანი პირი, რომელიც საქართველოში ცხოვრობს და რომლის ორივე მშობელი უცნობია, საქართველოს მოქალაქედ მიიჩნევა, ვიდრე საწინააღმდეგო არ დადგინდება.

3. საქართველოს მოქალაქეობიდან გასვლის საკითხის განსახილველად განმცხადებელმა უფლებამოსილ ორგანოში უნდა წარადგინოს:





ა) საქართველოს მოქალაქეობის დამადასტურებელი დოკუმენტის (საქართველოს მოქალაქის პირადობის მოწმობა, საქართველოს მოქალაქის პასპორტი, ყოფილი სსრკ-ის სიმბოლიკიანი პასპორტი, რეგისტრაციის დამადასტურებელი დოკუმენტი) ასლი;

ბ) 18-დან 27 წლამდე ასაკის პირის შემთხვევაში - სამხედრო ბილეთის ასლი ან ცნობა სამხედრო სამსახურში გაწვევის გადავადების, სამხედრო სამსახურში გაწვევისაგან ან სამხედრო ვალდებულების მოხდისაგან გათავისუფლების შესახებ;

გ) არასრულწლოვანი პირის საქართველოს მოქალაქეობიდან გასვლის შემთხვევაში - პირის დაბადების მოწმობის ასლი, აგრეთვე მისი კანონიერი წარმომადგენლის წერილობითი თანხმობა.

4. საქართველოს მოქალაქეობიდან გასვლის მსურველი პირის მიერ სახელის ან/და გვარის გამოცვლის შემთხვევაში, განმცხადებელს შესაძლოა მოეთხოვოს სახელის ან/და გვარის გამოცვლის დამადასტურებელი დოკუმენტის ასლის წარდგენა.

### **მუხლი 39**

1. საქართველოს მოქალაქეობიდან გასვლის საკითხთა განხილვის პროცესში სააგენტო, საჭიროების შემთხვევაში, კომპეტენტური ორგანოებისაგან გამოითხოვს ცნობებს იმის შესახებ, არის თუ არა დაინტერესებული პირი ბრალდებული საქართველოს სისხლის სამართლის კოდექსით გათვალისწინებული დანაშაულის ჩადენაში და ხომ არ არსებობს მის მიმართ კანონიერ ძალაში შესული სასამართლოს განაჩენი, რომელიც ექვემდებარება აღსრულებას, აგრეთვე, არსებობს თუ არა სახელმწიფოს წინაშე შეუსრულებელი მოვალეობა.

2. სახელმწიფო ორგანოებს, რომელთა მიმართაც საქართველოს მოქალაქეობიდან გასვლის მსურველ პირს აქვს შეუსრულებელი ვალდებულებები, უფლება აქვთ მიმართონ სააგენტოს და წარუდგინონ აღნიშნულის დამადასტურებელი დოკუმენტი (ხელშეკრულება, სასამართლოს გადაწყვეტილება, სააღსრულებო ფურცელი და სხვ.).

3. სააგენტოს უფლება აქვს შეაჩეროს საქართველოს მოქალაქეობიდან გასვლის საკითხის განხილვა მითითებული დამაბრკოლებელი გარემოებების აღმოფხვრამდე. საკითხის განხილვის შეჩერების შემთხვევაში, საქმის განხილვის ვადა არ უნდა აღემატებოდეს 3 თვეს. აღნიშნული ვადის გასვლისთანავე საქმისწარმოება წყდება.

### **მუხლი 40**

1. პირი საქართველოს მოქალაქეობას დაკარგავს, თუ:

ა) საქართველოს კომპეტენტური ორგანოების ნებართვის გარეშე შევა სხვა ქვეყნის სამხედრო სამსახურში ან პოლიციის ან უშიშროების სამსახურში;

ბ) მოიპოვებს საქართველოს მოქალაქეობას ყალბი დოკუმენტების წარდგენით;

გ) მოიპოვებს სხვა ქვეყნის მოქალაქეობას.

2. საქართველოს მოქალაქეობის დაკარგვის შესახებ კომპეტენტური ორგანოები სააგენტოს მიმართავენ წარდგინებით. წარდგინებას თან უნდა ერთოდეს:

ა) საქართველოს მოქალაქეობის დამადასტურებელი დოკუმენტის (საქართველოს მოქალაქის პირადობის მოწმობა, საქართველოს მოქალაქის პასპორტი და სხვ.) ასლი, ამ დოკუმენტების ფლობის შემთხვევაში;

ბ) საქართველოს მოქალაქეობის დაკარგვის კანონით გათვალისწინებული საფუძვლების დამადასტურებელი დოკუმენტი (უცხო სახელმწიფოს სამხედრო სამსახურში, პოლიციისა და უშიშროების სამსახურებში საქართველოს კომპეტენტური ორგანოების უნებართვოდ შესვლის დამადასტურებელი დოკუმენტი; ყალბი დოკუმენტების წარდგენის საფუძველზე საქართველოს მოქალაქეობის მოპოვების დამადასტურებელი დოკუმენტი ან სხვა სახელმწიფოს მოქალაქეობის მოპოვების დამადასტურებელი დოკუმენტი).

### **მუხლი 41**

1. კანონის 21-ე მუხლის პირველი პუნქტის „ა“ ქვეპუნქტით განსაზღვრული საფუძვლით მოქალაქეობის დაკარგვის საქმისწარმოებისას სააგენტო ვალდებულია საქართველოს მთავრობის დადგენილებით განსაზღვრული კომპეტენტური ორგანოდან გამოითხოვოს ინფორმაცია სხვა ქვეყნის სამხედრო სამსახურში, პოლიციისა და უშიშროების სამსახურებში საქართველოს მოქალაქის შესვლის ნებართვის არსებობის თაობაზე.

2. თუ სააგენტოსათვის კომპეტენტური ორგანოების წარდგინების გარეშე ცნობილი გახდება პირის მიერ საქართველოს მოქალაქეობის დაკარგვის საფუძვლების არსებობა, იგი დადგენილი წესით განიხილავს მოქალაქეობის დაკარგვის საკითხს და დასკვნას წარუდგენს საქართველოს პრეზიდენტს.



## თავი XI

მოქალაქეობის საკითხებზე საქართველოს პრეზიდენტის მიერ მიღებულ გადაწყვეტილებათა აღსრულება, მათი კონტროლისა და მოქალაქეობის საკითხთა სტატისტიკის წარმოების წესი

### მუხლი 42

მოქალაქეობის საკითხებზე საქართველოს პრეზიდენტის ბრძანებულებები და განკარგულებები ხელმოწერიდან არა უგვიანეს 2 დღეში აღსასრულებლად ეგზავნება სააგენტოს.

### მუხლი 43

მოქალაქეობის საკითხებზე მიღებული გადაწყვეტილების შესახებ დაინტერესებულ პირებს ეცნობებათ ამ დებულებით გათვალისწინებული წესით.

### მუხლი 44

1. სააგენტო, ტერიტორიული სამსახურიდან მიღებული ინფორმაციის საფუძველზე, წელიწადში არანაკლებ ერთხელ საქართველოს პრეზიდენტს წარუდგენს ანგარიშს მის მიერ მიღებულ გადაწყვეტილებათა აღსრულების მდგომარეობის შესახებ.

2. ანგარიშში უნდა აღინიშნოს მიღებულ გადაწყვეტილებათა შესრულების ვადები, გატარებულ ღონისძიებათა დეტალები, გადაწყვეტილებათა აღსრულების წესების დარღვევისას – დარღვევის შინაარსი, აღსრულების გაჭიანურების მიზეზები და სხვ.

### მუხლი 45

1. საქართველოში მოქალაქეობის ერთიანი სისტემის უზრუნველყოფის მიზნით სააგენტო აღნუსხავს საქართველოს მოქალაქეობის მოპოვებისა და საქართველოს მოქალაქეობის შეწყვეტის დინამიკას.

2. უცხოელისათვის საქართველოს მოქალაქეობის მოპოვებისა და შეწყვეტის ერთიან სტატისტიკას აწარმოებს სააგენტო.

## თავი XII

უცხოელისათვის საპატიო მოქალაქეობის მინიჭების წესი

### მუხლი 46

1. საქართველოს საპატიო მოქალაქეობა საქართველოს პრეზიდენტმა შეიძლება მისივე თანხმობით მიანიჭოს იმ უცხოელს, რომელსაც საქართველოსა და კაცობრიობის წინაშე აქვს განსაკუთრებული დამსახურება თავისი სამეცნიერო, საზოგადოებრივი საქმიანობით, ან აქვს პროფესია და კვალიფიკაცია, რომლითაც დაინტერესებულია საქართველო და მისთვის საქართველოს საპატიო მოქალაქეობის მინიჭება გამომდინარეობს სახელმწიფო ინტერესებიდან.

2. საპატიო მოქალაქეზე არ გაიცემა საქართველოს მოქალაქის პირადობის მოწმობა/პასპორტი. საპატიო მოქალაქეობა ნიშნავს საქართველოსთან სიმბოლურ და არა სამართლებრივ კავშირს. საპატიო მოქალაქეობა არ წარმოშობს საქართველოს მოქალაქისათვის კანონმდებლობით დადგენილ უფლებებსა და მოვალეობებს.

### მუხლი 47

1. ნებისმიერი პირი უფლებამოსილია საქართველოს პრეზიდენტს მიმართოს განცხადებით უცხოელისათვის საპატიო მოქალაქეობის მინიჭების თაობაზე. განცხადება უნდა შეიცავდეს უცხოელისათვის საპატიო მოქალაქეობის მისანიჭებლად ამ დებულების 46-ე მუხლის პირველი პუნქტით გათვალისწინებული წინაპირობების არსებობის დასაბუთებას.

2. განცხადებას თან უნდა დაერთოს საქართველოს საპატიო მოქალაქეობის მისანიჭებლად წარდგენილი პირის:

ა) პირადობის ან უცხო ქვეყნის სახელმწიფოს მოქალაქეობის (მოქალაქეობის არქონის) დამადასტურებელი დოკუმენტის კანონმდებლობით დადგენილი წესით დამოწმებული ასლი;

ბ) წერილობითი თანხმობა საპატიო მოქალაქეობის მინიჭების შესახებ.

### მუხლი 48

1. საქართველოს პრეზიდენტის დავალების საფუძველზე დეპარტამენტი იხილავს ამ დებულების 47-ე მუხლის შესაბამისად წარმოდგენილ მასალას.

2. უცხო ქვეყნის მოქალაქის საქართველოსთან სამართლებრივი კავშირის არსებობის თაობაზე საფუძვლიანი ეჭვის შემთხვევაში, დეპარტამენტი უფლებამოსილია სააგენტოს მიმართოს პირის საქართველოსთან სამართლებრივი კავშირის დადგენის მოთხოვნით.

3. სააგენტო შესაბამის დასკვნას წარმოადგენს მიმართვიდან არა უგვიანეს 3 დღისა, რის შემდგომაც, დეპარტამენტი საქართველოს პრეზიდენტისათვის წარსადგენად ამზადებს ბრძანებულების პროექტს უცხოელისათვის საპატიო მოქალაქეობის მინიჭების შესახებ.

### მუხლი 49

1. საქართველოს პრეზიდენტის მიერ საპატიო მოქალაქეობის მინიჭების შემთხვევაში, დეპარტამენტი უზრუნველყოფს პირისათვის საპატიო მოქალაქეობის დამადასტურებელი დოკუმენტისა და მედალიონის



გადასაცემად მომზადებას.

2. საქართველოს საპატიო მოქალაქეობის დამადასტურებელი დოკუმენტისა და მედალიონის დამზადებას უზრუნველყოფს საქართველოს პრეზიდენტის ადმინისტრაცია.

### **მუხლი 50**

1. პირს შეიძლება შეუწყდეს საქართველოს საპატიო მოქალაქეობა იმ შემთხვევაში, თუ მან ჩაიდინა:

ა) საერთაშორისო დანაშაული მშვიდობისა და ადამიანობის წინააღმდეგ;

ბ) საქართველოს სახელმწიფო ინტერესების წინააღმდეგ მიმართული ქმედება.

2. საქართველოს საპატიო მოქალაქეობის შეწყვეტის უფლება აქვს საქართველოს პრეზიდენტს.

### **მუხლი 51**

საქართველოს კანონმდებლობით საქართველოს საპატიო მოქალაქეებისათვის შესაძლებელია გათვალისწინებულ იქნეს სხვადასხვა პრივილეგია.

## **მუხლი 51<sup>1</sup>**

საქართველოს პრეზიდენტი უფლებამოსილია უცხოელს საპატიო მოქალაქეობა მიანიჭოს 47-ე და/ან 48-ე მუხლებით გათვალისწინებული მოთხოვნების დაუცველად.

*საქართველოს პრეზიდენტის 2015 წლის 8 ივნისის ბრძანებულება №198 - ვებგვერდი, 09.06.2015წ.*

## **თავი XIII**

### **გარდამავალი დებულებები**

### **მუხლი 52**

საქართველოს მოქალაქეობის მოპოვების თაობაზე ამ ბრძანებულების ამოქმედებამდე წარდგენილი განცხადებების განხილვა დასრულდეს შესაბამისად:

ა) საქართველოს მოქალაქეობის მიღების თაობაზე წარდგენილი განცხადებისა - ჩვეულებრივი წესით საქართველოს მოქალაქეობის მინიჭების საკითხთა განხილვის წესით;

ბ) საქართველოს მოქალაქეზე დაქორწინებული პირის საქართველოს მოქალაქედ მიღების თაობაზე - საქართველოს მოქალაქეობის გამარტივებული წესით მინიჭების საკითხთა განხილვის წესით;

გ) რეპატრიანტის სტატუსის მქონე პირის საქართველოს მოქალაქედ მიღების თაობაზე - საქართველოს მოქალაქეობის გამარტივებული წესით მინიჭების საკითხთა განხილვის წესით;

დ) საქართველოს მოქალაქეობის მინიჭების თაობაზე - საქართველოს მოქალაქეობის საგამონაკლისო წესით მინიჭების საკითხთა განხილვის წესით;

ე) საქართველოს მოქალაქეობის აღდგენის თაობაზე - საქართველოს მოქალაქეობის აღდგენის წესით მინიჭების საკითხთა განხილვის წესით.

### **მუხლი 53**

1. საქართველოს მოქალაქეებად, იმ პირების გარდა, რომლებმაც საქართველოს მოქალაქეობა კანონის შესაბამისად მოიპოვეს ან მოიპოვებენ, მიიჩნევიან:

ა) 1975 წლის 31 მარტამდე დაბადებული პირები, რომლებიც საქართველოში ცხოვრობდნენ ჯამში არანაკლებ 5 წლის განმავლობაში, 1993 წლის 31 მარტისთვის იმყოფებოდნენ საქართველოს ტერიტორიაზე და რომლებსაც არ მიუღიათ სხვა ქვეყნის მოქალაქეობა;

ბ) 1975 წლის 31 მარტის შემდეგ დაბადებული პირები, რომლებიც 1993 წლის 31 მარტისთვის ცხოვრობდნენ საქართველოში და რომლებსაც არ მიუღიათ სხვა ქვეყნის მოქალაქეობა;

გ) საქართველოს ტერიტორიაზე დაბადებული პირები, რომლებმაც 1991 წლის 21 დეკემბრის შემდეგ დატოვეს საქართველოს ტერიტორია და, ამდენად, ვერ აკმაყოფილებენ ამ პუნქტის „ა“ და „ბ“ ქვეპუნქტის მოთხოვნებს, თუ მათ არ მიუღიათ სხვა ქვეყნის მოქალაქეობა.

2. ამ მუხლის პირველი პუნქტის „ა“ ქვეპუნქტის შესაბამისად, საქართველოს მოქალაქეობის დადგენის საკითხის განსახილველად პირმა უფლებამოსილ ორგანოში უნდა წარადგინოს:



ა) საქართველოში ჯამურად არანაკლებ 5 წლის განმავლობაში ცხოვრების დამადასტურებელი დოკუმენტი (პასპორტის, სამხედრო ბილეთის, შრომის წიგნაკის ასლი ან ცნობა სამუშაო ადგილიდან, შესაბამისი მუნიციპალიტეტის აღმასრულებელ ორგანოსთან (ქალაქ თბილისის მუნიციპალიტეტში – ქალაქ თბილისის მერთან) არსებული პირის მუნიციპალიტეტის ტერიტორიაზე ცხოვრების (ყოფნის) ფაქტის დამდგენი კომისიის მიერ გაცემული ცნობა ან/და იურიდიული ფაქტის დამადასტურებელი სხვა დოკუმენტი);

ბ) 1993 წლის 31 მარტისათვის საქართველოში ყოფნის დამადასტურებელი დოკუმენტი (პასპორტის, სამხედრო ბილეთის, შრომის წიგნაკის ასლი ან ცნობა სამუშაო ადგილიდან, შესაბამისი მუნიციპალიტეტის აღმასრულებელ ორგანოსთან (ქალაქ თბილისის მუნიციპალიტეტში – ქალაქ თბილისის მერთან) არსებული პირის მუნიციპალიტეტის ტერიტორიაზე ცხოვრების (ყოფნის) ფაქტის დამდგენი კომისიის მიერ გაცემული ცნობა, ან/და იურიდიული ფაქტის დამადასტურებელი სხვა დოკუმენტი).

3. ამ მუხლის პირველი პუნქტის „ბ“ ქვეპუნქტის შესაბამისად, საქართველოს მოქალაქეობის დადგენის საკითხის განსახილველად წარდგენილი უნდა იქნეს:

ა) დაბადების დამადასტურებელი დოკუმენტის (დაბადების მოწმობა, საქართველოს მოქალაქის პირადობის მოწმობა, პასპორტი, მშობლების საპასპორტო მონაცემები) ასლი;

ბ) 1993 წლის 31 მარტისათვის საქართველოში ცხოვრების ფაქტის დამადასტურებელი დოკუმენტების ასლები ან შესაბამისი მუნიციპალიტეტის აღმასრულებელ ორგანოსთან (ქალაქ თბილისის მუნიციპალიტეტში – ქალაქ თბილისის მერთან) არსებული პირის მუნიციპალიტეტის ტერიტორიაზე ცხოვრების (ყოფნის) ფაქტის დამდგენი კომისიის მიერ გაცემული ცნობა.

4. ამ მუხლის პირველი პუნქტის „გ“ ქვეპუნქტის შესაბამისად, საქართველოს მოქალაქეობის დადგენის საკითხის განსახილველად წარდგენილი უნდა იქნეს:

ა) საქართველოში დაბადების დამადასტურებელი დოკუმენტის (დაბადების მოწმობა, საქართველოს მოქალაქის პირადობის მოწმობა, პასპორტი, მშობლების საპასპორტო მონაცემები) ასლი;

ბ) 1991 წლის 21 დეკემბრის შემდეგ საქართველოს ტერიტორიის დატოვების ფაქტის დამადასტურებელი დოკუმენტების (პასპორტი, სამხედრო ბილეთი, შრომის წიგნაკი ან/და იურიდიული ფაქტის დამადასტურებელი სხვა დოკუმენტი) ასლები ან შესაბამისი მუნიციპალიტეტის აღმასრულებელ ორგანოსთან (ქალაქ თბილისის მუნიციპალიტეტში – ქალაქ თბილისის მერთან) არსებული პირის მუნიციპალიტეტის ტერიტორიაზე ცხოვრების (ყოფნის) ფაქტის დამდგენი კომისიის მიერ გაცემული ცნობა.

5. ამ მუხლის პირველი პუნქტის საფუძველზე საქართველოს მოქალაქეობის დადგენის საკითხის განხილვისას, სხვა ქვეყნის მოქალაქეობის მიღების საფუძვლის არსებობის შემთხვევაში, განმცხადებელი ვალდებულია წარადგინოს შესაბამისი ქვეყნის კომპეტენტური ორგანოების მიერ გაცემული ცნობა ამ ქვეყნის მოქალაქეობის არქონის შესახებ. ეს მოთხოვნა სავალდებულო არ არის იმ ქვეყნებთან მიმართებით, რომლებიც ანალოგიურ ცნობებს არ გასცემენ.

6. სააგენტო უფლებამოსილია სხვა ქვეყნის კომპეტენტური ორგანოდან გამოითხოვოს ინფორმაცია დაინტერესებული პირის მოქალაქეობრივი კუთვნილების შესახებ. მოქალაქეობის დადგენის თაობაზე ადმინისტრაციული წარმოების დასრულებამდე ინფორმაციის მიუღებლობის შემთხვევაში, მიიჩნევა, რომ დაინტერესებული პირი არ ფლობს ამ ქვეყნის მოქალაქეობას და იგი მიიჩნევა საქართველოს მოქალაქედ, საწინააღმდეგოს დადგენამდე.

*საქართველოს პრეზიდენტის 2016 წლის 30 ივნისის ბრძანებულება №154 - ვებგვერდი, 30.06.2016წ.*

#### **მუხლი 54**

1. საქართველოსთან პირის სამართლებრივი კავშირის დადგენის თაობაზე გადაწყვეტილება მიიღება დასკვნის სახით, რომელიც დადგენილი წესით ეცნობება განმცხადებელს.

2. დასკვნას ხელს აწერს სააგენტოს უფლებამოსილი სტრუქტურული ერთეულის უფროსი.

3. თუ პირი დაბადებულია საქართველოს ტერიტორიაზე და მას არ აქვს საქართველოს მოქალაქეობის დამადასტურებელი ან საქართველოსთან სამართლებრივი კავშირის დასადგენად საჭირო დოკუმენტაცია, სააგენტო ამ დებულების შესაბამისად განიხილავს ასეთი პირის საქართველოსთან სამართლებრივი კავშირის დადგენის საკითხს და დადებითი გადაწყვეტილების შემთხვევაში, გასცემს პირადობის მოწმობას.

4. საცხოვრებელი ადგილის მიხედვით რეგისტრაციის განხორციელების, პირადობის დამადასტურებელი დოკუმენტის ან დასაბრუნებელი მოწმობის გაცემის მოთხოვნით საქართველოს დიპლომატიური



წარმომადგენლობის ან საკონსულო დაწესებულებისათვის პირის მიმართვისას, საქართველოს მოქალაქეობის დადგენის საკითხს, ასეთის საჭიროების შემთხვევაში, ამ დებულების შესაბამისად განიხილავს სააგენტო, ხოლო ტერიტორიული სამსახურისათვის მიმართვის შემთხვევაში - ტერიტორიული სამსახური.

5. ამ მუხლის მე-3 და მე-4 პუნქტებით განსაზღვრულ შემთხვევებში, საქართველოსთან პირის სამართლებრივი კავშირის დადგენა ხორციელდება დასკვნის გამოცემის გარეშე.

#### **მუხლი 55**

1. საქართველოს ტერიტორიაზე დაბადებულ პირს, რომელსაც არ უდგინდება საქართველოს მოქალაქეობა ამ დებულების 53-ე მუხლის საფუძველზე კანონის 31-ე მუხლის შესაბამისად, უფლება აქვს მიიღოს საქართველოს მოქალაქეობა, თუ იგი აკმაყოფილებს ამ დებულების 26-ე მუხლის პირველი პუნქტის „ბ“ და „გ“ ქვეპუნქტების მოთხოვნებს და მის მიმართ არ არსებობს კანონით გათვალისწინებული მოქალაქეობის მოპოვებაზე უარის თქმის საფუძველები.
2. მოქალაქეობის სპეციალური წესით მინიჭების შემთხვევაში, დაინტერესებული პირი სააგენტოში განცხადებასთან ერთად წარადგენს:

ა) დაბადების მოწმობის ასლს, თუ ასეთი არ მოიპოვება სააგენტოს ერთიან რეესტრში;

ბ) ვინაობის/პირადობის დამადასტურებელი დოკუმენტის ასლს (პირადობის/ ბინადრობის მოწმობა, პასპორტის, სამხედრო ბილეთის, შრომის წიგნაკის ასლი ან ცნობა სამუშაო ადგილიდან, ან/და იურიდიული ფაქტის დამადასტურებელი სხვა დოკუმენტი).

#### **მუხლი 56**

1. ეთხოვოს საქართველოს იუსტიციის სამინისტროს, 2 თვეში უზრუნველყოს კანონის მე-12 მუხლის მე-5 პუნქტით გათვალისწინებული სახელმწიფო ენის, საქართველოს ისტორიისა და სამართლის ძირითადი საფუძვლების ცოდნის ფარგლების დადგენასთან დაკავშირებით შესაბამისი წინადადებების მომზადება.
2. ამ მუხლის პირველი პუნქტით გათვალისწინებულ პერიოდში სახელმწიფო ენის, საქართველოს ისტორიისა და სამართლის ძირითადი საფუძვლების ცოდნის ფარგლების დადგენა განხორციელდეს ამ დებულების ამოქმედებამდე განსაზღვრული წესით.

